

【经文信息】大正藏第 20 册 No. 1043

请观世音菩萨消伏毒害陀罗尼咒经 1 卷

No. 1043 [cf. Nos. 1044, 1045]

请观世音菩萨消伏毒害陀罗尼咒经

东晋天竺居士竺难提晋言法喜译

如是我闻。一时佛住毘舍离庵罗树园大林精舍重阁讲堂。与千二百五十比丘。皆阿罗汉诸漏已尽。不受后有如炼真金。身心澄静六通无碍。其名曰大智舍利弗摩诃目犍连。摩诃迦叶摩诃迦旃延。须菩提阿[少/兔]楼驮。劫宾那桥梵波提。毕陵伽婆蹉薄拘罗。难陀阿难陀罗睺罗。如是等众所知识。常为天龙八部所敬。复有菩萨摩訶萨二万人俱。大智本行皆悉成就。调伏诸根满足六度。具佛威仪心大如海。其名曰文殊师利童子宝月童子。月光童子宝积童子。曰藏童子。跋陀婆罗菩萨。与其同类十六人俱。弥勒菩萨如是等菩萨摩訶萨二万人。尔时世尊与四众天龙八部人非人等恭敬围遶。时毘舍离国一切人民遇大恶病。一者眼赤如血。二者两耳出脓。三者鼻中流血。四者舌噤无声。五者所食之物化为麁涩。六识闭塞犹如醉人。有五夜叉名讫拏迦罗。面黑如墨而有五眼。狗牙上出吸人精气。时毘舍离大城之中。有一长者名曰月盖。与其同类五百长者。俱诣佛所到佛所已头面作礼却住一面。白言世尊。此国人民遇大恶病。良医耆婆尽其道术所不能救。唯愿天尊慈愍一切。救济病苦令得无患。尔时世尊告长者言。去此不远正主西方。有佛世尊名无量寿。彼有菩萨名观世音及大势至。恒以大悲怜愍一切救济苦厄。汝今应当五体投地向彼作礼。烧香散华系念数息。令心不散经十念顷。为众生故当请彼佛及二菩萨。说是语时于佛光中。得见西方无量寿佛并二菩萨。如来神力佛及菩萨俱到此国。往毘舍离住城门阇。佛二菩萨与诸大众放大光明。照毘舍离皆作金色。尔时毘舍离人。即具杨枝净水。授与观世音菩萨。大悲观世音。怜愍救护一切众生故而说呪曰。普教一切众生而作是言。汝等今者应当一心称。南无佛南无法南无僧。南无观世音菩萨摩訶萨。大悲大名称救护苦厄者。如此三称三宝。三称观世音菩萨名。烧众名香五体投地。向于西方一心一意令气息定。为免苦厄请观世音。合十指掌而说偈言。

愿救我苦厄 大悲覆一切
普放净光明 灭除痴暗冥
为免杀害苦 烦恼及众病
必来至我所 施我大安乐
我今稽首礼 闻名救厄者
我今自归依 世间慈悲父
唯愿必定来 免我三毒苦
施我今世乐 及与大涅槃

白佛言世尊。如是神呪必定吉祥。乃是过去现在未来十方诸佛大慈大悲陀罗尼印。闻此呪者众苦永尽。常得安乐远离八难。得念佛定现前见佛。我今当说十方诸佛救护众生神呪。

多耶咄(强鹅反)呜呼臙(名好喉鬼)摸呼臙(名为痴鬼)阎婆臙(名怕人鬼)耽婆臙(名叛人鬼)安茶罽(名不白鬼)般茶罽(名为白鬼)首埤帝(名为青鬼)般般茶茶啰啰(名鬼母前鬼母)婆私臙多侄咄(如是)伊犁寐梨(名为去鬼)提梨首梨(名叛人鬼)加波梨(名戴髑髅鬼及缚着两颊)佉鞞端耆(名食儿鬼)旃陀梨(名就人鬼)摩登耆(名师子头鬼魔王鬼师子头)勒叉勒叉(守护一切众生)萨婆萨埵萨婆婆耶埤(云一切可鬼)纱诃(云[稳-禾]去)多茶咄伽帝伽帝臙伽帝(云已去也)修留毘修留毘(去莫来莫来也)勒叉勒叉(云守护)萨婆萨婆婆耶埤纱诃(云[稳-禾]去)

白佛言世尊如此神呪。乃是十方三世无量诸佛之所宣说。诵持此呪者。常为诸佛诸大菩萨之所护持免离怖畏刀杖毒害。及与疾病令得无患。说是语时毘舍离人平复如本。

尔时世尊怜愍众生覆护一切。重请观世音菩萨。说消伏毒害陀罗尼呪。尔时观世音菩萨。大悲熏心承佛神力。而说破恶业障消伏毒害陀罗尼呪。

南无佛陀 南无达摩 南无僧伽 南无观世音菩提萨埵摩诃萨埵大慈大悲唯愿愍我救护苦恼亦救一切怖畏众生令得大护。

多侄咄 陀呼臙(名大鬼)摸呼臙(名水鬼)阎婆臙耽婆臙阿婆𩇗(虚抵反名人嗔鬼)摸呼臙(此鬼口出火名曰光鬼)安茶梨(名曰花鬼)般茶梨(此鬼身白名曰白鬼)输鞞帝(名极白鬼)般茶啰婆私臙休休楼楼(三头鬼)安茶梨兜兜楼楼(名三头儿鬼)般茶梨(名母黑儿白鬼)周周楼楼(入山中去不杀周周楼楼名好偷人小儿山中住鬼)臙盘茶梨(名出白鬼)豆豆富富(豆豆名欲便去鬼富富名不更来鬼)般茶啰婆私臙矧墀(殍资反名亿鬼)跢墀(乃辇

反名不亿鬼)臙跢墀(名最忆鬼)萨婆阿婆耶羯多萨婆涅婆婆陀伽(莫着疑人)阿婆耶(莫作鬼)卑离陀(云饿鬼)闭殿娑诃(莫来[稳-禾]去)

一切怖畏一切毒害一切恶鬼虎狼师子闻此呪时口即闭塞不能为害。破梵行人作十恶业。闻此呪时荡除粪秽还得清淨。设有业障浊恶不善。称观世音菩萨诵持此呪。即破业障现前见佛。佛告阿难若有四部弟子。受持观世音菩萨名。诵念消伏毒害陀罗尼。行此呪者身常无患心亦无病。设使大火从四面来焚烧己身。诵持此呪故龙王降雨即得解脱。设火焚身节节疼痛。一心称观世音菩萨名号。三诵此呪即得除愈。设复谷贵饥馑王难。恶兽盗贼迷于道路。牢狱系闭桎械枷锁被五系缚。入于大海黑风回波。水色之山夜叉罗刹之难。毒药刀剑临当刑戮。过去业缘现造众恶。以是因缘受一切苦极大怖畏。应当一心称观世音菩萨名号。并诵此呪一遍至七遍消伏毒害。恶业恶行不善恶聚。如火焚薪永尽无余。以是因缘此观世音菩萨所说神呪。名施一切众生甘露妙药。得无病畏不横死畏不被系缚畏。贪欲嗔恚愚痴三毒等畏。是故此娑婆世界。皆号观世音菩萨为施无畏者。此陀罗尼灌顶章句无上梵行。毕定吉祥大功德海。众生闻者获大安乐应当闍诵。若欲诵之应当持斋。不饮酒不噉肉。以灰涂身澡浴清淨。不食兴渠五辛。能熏之物悉不食之。妇女秽污皆悉不往。常念十方佛及七佛世尊。一心称观世音菩萨诵持此呪。现身得见观音菩萨。一切善愿皆得成就。后生佛前长与苦别。佛告阿难王舍大城有一女人。恶鬼所持名旃陀利。彼鬼昼夜作丈夫形来娆此女。鬼精着身生五百鬼子。汝忆是事不。我于尔时教此女人。称观世音菩萨。善心相续入善境界。阿难当知如此菩萨威神之力恶鬼消伏。得见我身无比色像。我于尔时一一毛孔现宝莲华。无数化佛异口同音。称赞大悲施无畏者。令女受持读诵通利。此呪功德三障永尽。免三界狱火不受众苦。四百四病一时不起。设有众生入阵鬪战临当被害。诵念此呪称于大悲观世音菩萨名。如鹰隼飞即得解脱。若有众生受大苦恼。闭在囹圄桎械枷锁。及诸刑罚一日乃至十日。一月乃至五月。应当净心系念一处。称观世音菩萨归依三宝。三称我名诵大吉祥六字章句救苦神呪。而说呪曰。

多佺咄 安陀罽 般荼罽 枳由罽(名著璎珞鬼)檀陀罽(名捉铁捧鬼)臙陀罽(名捉鉞鬼)底耶婆陀(名与人光鬼)耶除婆陀(名闻鬼)颇罗臙祇(名长出齿鬼)难多罽(名大身鬼)婆伽罽(名大面鬼)阿卢祢(名闭目鬼)薄鳩罽(名著钟鬼此鬼两耳着大钟)摸鳩隶(名披头鬼)兜毘隶(名住石窟鬼)纱呵

尔时世尊说是神呪已。告阿难言。若善男子善女人四部弟子。得闻观世音菩萨名号。并受持读诵六字章句。若行旷野迷失道径。诵此呪故观世音菩萨。

大悲熏心化为人像。示其道路令得安隐。若当饥渴化作泉井。果蓏饮食令得饱满。设复有人遇大祸对。亡失国土妻子财产与怨憎会。称观世音菩萨名号。诵念此呪数息系念。无分散意经七七日。时大悲者化为天像。及作大力鬼神王像。接还本土令得安隐。若复有人入海采宝空山旷野逢值虎狼师子毒虫蝮蝎。夜叉罗刹拘盘荼。及诸恶鬼噉精气者。三称观世音菩萨名号。及诵此呪即得解脱。若有妇人生产难者临当命终。三称观世音菩萨名号。并诵持此呪即得解脱。遇大恶贼盗其财物。三称观世音菩萨名号诵持此呪。贼即慈心复道而去。阿难当知。如此菩萨及是神呪毕定吉祥。常能消伏一切毒害真实不虚。普施三界一切众生令无怖畏。作大拥护今世受乐。后世生处见佛闻法速得解脱。此呪威神巍巍无量。能令众生免地狱苦。饿鬼苦畜生苦。阿修罗苦及八难苦。如水灭火永尽无余。阿难当知。若有受持观世音菩萨名并持此呪。获大善利消伏毒害。今世后世不吉祥事永尽无余。持戒精进念定总持皆悉具足。阿难当知若有闻此六字章句救苦医王无上神呪。称观世音菩萨大悲名字罪垢消除。即于现身得见八十亿诸佛皆来授手。为说大悲施无畏者功德神力并六字章句。以见佛故即得无忘旋陀罗尼。尔时世尊而说偈言。

大悲大名称 吉祥安乐人
恒说吉祥句 救济极苦者
众生若闻名 离苦得解脱
亦游戏地狱 大悲代受苦
或处畜生中 化作畜生形
教以大智能 令发无上心
或处阿修罗 软言调伏心
令除憍慢习 疾至无为岸
现身作饿鬼 手出香色乳
饥渴逼切者 施令得饱满
大慈大悲心 游戏于五道
恒以善集慧 普教一切众
无上胜方便 令离生死苦
常得安乐处 到大涅槃岸

尔时世尊说是语已。告阿难言。是六字章句毕定吉祥真实不虚。若有闻者获大善利得无量功德。说是语已。王舍大城有一比丘名优波斯那。精进勇猛勤行难行苦行。如救头然。在寒林中与无央数大众围绕。自说往昔作诸恶行杀生无量。闻观世音菩萨六字章句正念思惟观心心脉使想一处见观世音菩萨即

得解脱成阿罗汉。云何当得见观世音菩萨及十方佛。若欲得见。端身正心使心不动心气相续。以左手置右手上。举舌向腭令息调匀。使气不麤不细安祥。徐数从一至十成就息念。无分散意使气不麤。亦不外向不涩不滑。如婴儿饮乳吸气[口*数]之。不青不白调和得中。从于心端四十脉下取一中脉。令气从中安隐得至十四脉中。从大脉生至于舌下。复从舌脉出至于舌端。不青不白不黄不黑。如琉璃器正长八寸。至于鼻端还入心根令心明净。佛告诸比丘。此大精进勇猛宝幢六字章句。消伏毒害大悲功德。观世音菩萨以此数息。心定力故如驶水流。疾疾得见观世音菩萨及十方佛。佛告诸比丘汝等善听。欲服甘露无上法味。若诸比丘已得出家。当自摄身不坏威仪。端坐正受无外向意。观于苦空无常败坏不久磨灭。修五门禅当自观身。从头至足一一节间。皆令系念停住不散。谛观众节如芭蕉树内外俱空。当知色受想行识亦复如是。佛说是语时。尊者舍利弗。在寒林中还坐树下。已解佛意端坐正受。入于三昧身真金色。令无数人见者欢喜发菩提心。时优波斯那即从座起。至尊者舍利弗所。头面着地接足作礼。白言尊者。向者如来赞叹数息。以是因缘获大善利。云何数息唯愿尊者为我解说。眼眼识与色相应云何摄住。耳耳识与声相应云何摄住。鼻鼻识与香相应云何摄住。舌舌识与味相应云何摄住。意意识与攀缘相应云何摄住。诸颠倒想与颠倒相应云何摄住。色声香味触与细滑相应云何摄住。而此识贼如猿猴走。游戏六根遍缘诸法云何摄住。时舍利弗告优波斯那。汝今当观地大地无坚性。水大水性不住。风大风性无碍。从颠倒有火大火性不实。假因缘生色受想行识。一一性相同于水火风等。皆悉入于如实之际。时优波斯那闻是语已。身如水火得四大定。通达五阴空无所有。杀诸结贼豁然意解。得阿罗汉身中出火。即自碎身入般涅槃。时舍利弗收其舍利。于上起塔已。为佛作礼白佛言世尊。佛说禅定第一甘露无上法味。若有服者身如琉璃毛孔见佛。观无明行乃至老死。一一性相皆悉不实。如空谷响如芭蕉树无坚实。如热时焰如野马行。如干闥婆城如水上泡。如幻如化如露如电。一一谛观十二因缘成缘觉道。或入寂定琉璃三昧。见佛无数发无上心。修童真行住不退转佛告舍利弗。如优波斯那闻我说是大悲章句数息定法。破无数亿洞然之恶。成阿罗汉具戒定智解脱知见。身出水火碎身灭度。令无数人发大善心。舍利弗当知若善男子善女人。得闻观世音菩萨大悲名号。及消伏毒害六字章句。数息系念净行之法。除无数劫所造恶业破恶业障。现身得见无量无边诸佛。闻说妙法随意无碍。发三种清净三菩提心。若有宿世罪业因缘。及现所造极重恶行。梦中得见观世音菩萨。如大猛风吹于重云皆悉四散。得离重罪恶业生诸佛前。佛说是语已告舍利弗。我今为此受持观世音菩萨名号。消伏毒害无上章句。说偈赞叹。

我勅提头赖咤等 慈心拥护受持经
令闻大悲名号人 譬如天子法臣护
我勅海龙伊罗钵 慈心拥护受持经
如护眼目爱己子 昼夜六时不远离
我勅阎婆罗刹子 无数毒龙及龙女
慈心拥护持经者 如爱顶脑不敢触
我勅毘留勒迦王 慈心拥护持经者
如母爱子心无厌 昼夜拥护行住俱
我勅难陀跋难陀 娑伽罗王优波陀
慈心拥护持经者 恭敬供养接足礼
譬如诸天奉帝释 亦如孝子敬父母
犹如贫人护财宝 如盲须眼及正导
我勅一切诸鬼神 小龙毒蛇毒害兽
一切恶人恶口者 违逆此呪起不善
现身白癞脓血流 后堕地狱长夜苦
是故应当慈心护 受持读诵灌顶句
地狱清净如莲华 饿鬼破碎无八难
后生佛前入三昧 毕定当得不退转
普施一切大安乐 教诸众生修十地
我从过去无数佛 闻是消伏毒害呪
消除三障无诸恶 五眼具足成菩提
永与三界作父母 施其安乐得止息
若有闻我名号者 亦闻大悲观世音
诵持此呪离诸恶 不堕地狱及畜生
莲华化生为父母 心净柔软无尘垢
必闻无上大慧明 心定如地不可动
一切佛出世 明照如日月
身出大智光 如烧紫金山
三十二相中 流出八十好
譬如须弥山 映显于大海
众生闻名者 永离三恶道
得住无为处 常乐大涅槃
一切佛兴世 安乐众生故
异口各各身 端坐金刚座

口出五色光 莲华叶形舌
赞叹大悲者 调御师子法
护世观世音 毕定消毒害
净于三毒根 成佛道无疑

尔时世尊说此偈已。为受持观世音菩萨名者拥护此经故。说灌顶吉祥陀罗尼而说呪曰。

多侄咄 乌耽毘罽(名住山外鬼)兜毘罽(名住山窟鬼)耽埤(名烂目鬼)波罗耽埤(名食残果鬼住一切果树下食残)捺咤修捺咤(名好偷鬼)枳跋咤(名杀鱼鬼)牟那耶(名出家鬼)三摩耶(名三昧鬼)檀提(名捉杖鬼)臙罗枳尸(名好发女鬼)婆罗鳩卑(名住破肌鬼)乌罽(名瓔鬼)穰瞿罽(名尾鬼)纱诃

佛告舍利弗如此灌顶陀罗尼章句毕定吉祥若有得闻受持读诵。破恶业障终不横死。舍利弗白佛言世尊。如此神呪大吉祥句。普施一切无所怖畏。世尊往昔从何佛所得闻此句。唯愿世尊分别解说。使未来世普得闻知。获大安乐免离横死。刀杖毒药水火盗贼所不能害。佛告舍利弗我从过去无量佛所。得闻此句受持读诵。即得超越八千万劫生死之罪。又念过去八十万劫。有佛世尊名一切世间胜。十号具足。彼佛世尊为我演说如上章句。我即数息使心不散。[火*霍]然音解消伏结使。得无生法忍住首楞严三昧。若善男子善女人得闻此经。受持读诵书写解说。即得超越无量无数阿僧祇劫生死之罪。消伏毒害不与祸对。佛说是语时。五百长者子得无生法忍。无数人天发阿耨多罗三藐三菩提心。舍利弗阿难等白佛言。世尊此观佛三昧海。请观世音菩萨消伏毒害陀罗尼呪。所至到处一切吉祥。如梵天王众所爱敬。佛告阿难如是如是如汝所说若善男子善女人。得闻此经首题名字。常得见佛及诸菩萨。具足善根生净佛国。说此品时。八十亿天子天女及龙鬼神。皆悉欢喜发菩提心。舍利弗阿难等。闻佛所说礼佛而退。

请观世音菩萨消伏毒害陀罗尼呪经

【经文信息】大正藏第 20 册 No. 1043 请观世音菩萨消伏毒害陀罗尼咒经

【版本记录】CBETA 电子佛典 Rev. 1.13 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，北美某大德提供

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】

